

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo sarhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaa-janaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

² Pueyasocuaajaari tariucuaaanu na sequenu panishano caminiujiunaa pueya niishitiquiaari, nojori naajiotanura Pueyaso Rupaa, pa niishinuria taa Neyanu na miiniutianiya pocuarani.

³ Pueyano na quiniuria mijiria, Neyanu Jesucristoori rasaaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniuujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujuanaa Pueyaso Niyanu. Paari quiarijia na niishiya seetanujuanaa cutarani, Pueyaso Sohuanu samiitianiniuucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jitianurajuhujaj. Nojuajaari pa Jiyaniijia Jesucristo.

⁵ Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa

quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiutiniuria Neyanuucua, na tojitiajaca nojori quiniuria. ⁶ Niajanijajuhuj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurijuhuj. ⁷ Puetunu Pueyaso panishano pueyajanaa, canapue Pueyaso saquiriojoquiaari saa maninija nojori quiniuriacuajani, janiyari niaacuara naajioteyani. Pa Que Pueyaso, pa Jiyaniijia Jesucristojuhuj, nojori cuara cumaquiiria niajanija, maninia na tojijaca nia quiniuria. Naajuhuj, nojori cuara nioojiaca cajitiiria shuqiriata nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu paniyanijia, janiyari nia timitiaquiaani, maninia niajanijajiniji pueya pohuatanuucua puetunu jiyacajiniajanaa. Nojoriiri pohuataquiaa, niaanaari maninia tiuujaca pa Jiyaniijia Jesucristoocua. Naa Jesucristo miiniuucua niajanijatej, janiyari cua Pueyaso sequequiaani: “¡Paacarasho! Quiaari jiyanohua maninia”. ⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuatanura. Pueyasocuajaari niishiya, pueyaracaanu cua secojosacari nojuaja, janiyari niaacuara secojoquiaajuhuj. ¹⁰ Naa cua secojosacari nojuajatej, janiyari na sequequiaani cuara cua tiuqitiiria niaacua, rupaquijia cua quiniuria niaata, nojuaja jaara naa paniri. ¹¹ Janiyari nia

niquiniuucua jiaatiaani, cua cumaquiniuria socua niajaniya na Sohuanu cumaacata, socua jiyanoehua Pueyasocua tiuujiaa nia quiniuria. ¹² Majaari cua cumaquiniu paniniu saa niajanijaja. Janiyari paniyani nia cumaquiniuria janiyajuhuaaj. Naacuaajitij, mariyata pa tiuushacari Jesucristoocua, paari mariyata cumaquitiojonutaniyani.

¹³ Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuanu. Majaari juhuanajuaja cua naata quianu niaacua. Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaa tiuuniuria Jesuucujuhuaaj. Tamonu jiyacajinia taucuaaari tari Jesucristoocua tiuujiaa quiyacuaa, cua pohuatanuucua Jesucristojiniji nojori niquiara. Janiyari naa miiniu paniya nia tajiniajuhuaaj. ¹⁴ Cua Jiyaniiijaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuara pohuataara na rupaa puereetuuca tiacajinia pueya niquiara, mariyata tiquiyocua quijiaca pueya niquiarajuhuaaj. Janiya cuara na rupaa pohuataara niishijiaa pueya, niishiyashijiaa pueyanio. ¹⁵ Janiyari cunora quianu paniya Roma tiacajiniani, cua pohuatanura Jesucristojiniji niajaniya.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquiniu Jesucristo-jiniji cua pohuatanura. Jesucristo rupaacua-jaari Pueyaso cumaacaraca, pueya na jataninuria Pueyaso muerasu nojori quiniuria, nocua nojori tiuushacari. Puetunu Jesucristo tiuuniaa pueyapuejanaari Pueyaso pueyara jatanishaanutaniya, taa Judiocuaca jatanishaaquiaa Pueyaso pueyaracuaani. ¹⁷ Jesucristo pohuatasanojiniji paari niishiyani, Pueyasoori pa jiyanooquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucuacaanu Pueyaso Rupaajinia:

“Pueyaso jiyanooshano pueyanoori pueyara-
caanu shuquiriaatia quijia quiniutianiya,
saaja Pueyasoocua na tiuushacari”.

Pueyasora, puetunu pueyajanaari sesa miijiaca

¹⁸ Pueyasoori jiyocuacaanuji na tojiyashijiaca pueya saniitioquiaa. Naa nojori na sanitiosacaritij, Pueyasoori nojori numootequiaa, nojuajaari puetunu na tojiyashijiaca pueyajanaa saniitionutaniya jiyanoohua na juaaniutia. Naa saniitiosaanutaniyajaarihuaj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. ¹⁹ Nojori jaara Pueyaso niishiniuucua jiaatiariquia, nojori maara na niishirij. Pueyasocuaajaari tari nojori niishitiquiaari taamuecate nojuajani. Nojoricuajaari tari maninia nojuajiniji niishiya. ²⁰ Majaari pa naata Pueyaso niquniu pa

namijiata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhuj, majaari na cumaaca puequenu quiniutianiya. Pueyaracaanu quiriquianoori. Naacuajitij, Pueyaso saniitionu panishacari na tojiyashijiaca pueya, nojoriiri maja na naata sequenu quiniutianiya Pueyaso: “Maja canaa niishiniu quijia quiajanijajiniji”. ²¹ Nojoricuajaari Pueyaso niishijia najuhuanaj. Na niishijiaca nojori quishacari, nojoriiri saaja na rerequeteja. Nojoriiri na tojitiaaquiquiaajuhuj. Pueyaso miiniuucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasonaa”. Tama nojorijiaarijia jyanohua cushitiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiquiaa. ²² Nojori jyanishacari nojori cutaraari seetanujuanaa niishijiaca, naacuajitij nojoriiri socua niishiyashijiacara quiquiaa. ²³ Nojoriiri Pueyaso shuquiritiaaquiquiaa tama nojori shipinishano casaajaaja nojori shuquiritianura. Pa shipinia Pueyaso cutaraari jyanohua cumaacaraca, pueyaracaanu quijiajuhuanaj. Nojoriiri Pueyaso niti shuquiritiaquiaa tama nojori shipinijosanojuaja. Cuno, nojori shipinijosano Pueyaso niti na shuquiritiasocoriquianoni, cunoori quiquiaa juhua shaajeja pueya niquishano, juhua jaacuatujuaca niquishano-

juhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaca niquishanonio.

²⁴ Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitioosacari narta pueyanota. ²⁵ Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonuunu nojori tojiniuria saniniuujia. Naaratej, pueyari Pueyaso shipinijosano casami shuquiritiaquiaa, saniya na Shipinia niti. Nojuajaari pa Pueyasojuanaa cutara. Nojuaja cuara shuquiritiasaaria pueyaracaanu cutara.

²⁶ Pueya jaara Pueyaso cartequiaa, Pueyasoori nojori tarinitiaquiaajuhuj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷ Naajuhuj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jiyanohua cararaatia miitiooquiaa. Naa nojori miiniuucuatej, nojoriiri tama na cuaqueyajaaja miitiaquiaa naquiya na miishaanura.

²⁸ Nojori niishiniu paniyaquiniuucua Pueyaso, Pueyasoori nojori tarinitiaquiaa nojori miiniuria

tama nojori niishiriojosano sesajaaja. Nojoricua-
jaari niishiya, nojori miishanoori sesa. Naa-
jaa, nojoriiri saaja na miijiaca quiquiaa, cararaa-
tia miiniu niishiriojonuujuaca nojori quiniu-
cua. ²⁹ Naacuajitij, nojoriiri puetunu tamaatia
sesa miishanojuanaa miiniu niishijiaca. Jaara
sesa miiri, timiquioyari. Nojoriiri nio miijiaca:
puera casamiriaca quiniuucua jiaatiajaca. Sesa
miiquiaari na panishano nojori jitianura. No-
joriiri tamasaca pueya jittiasano casamiicua ji-
aatiajaca. Nojoriiri pueya puecoojuaca. No-
joriiri pueya ruutaqueja. Nojoriiri na panis-
hano casami nohuasenuujuaca jiyasohua. No-
joriiri narta pueya miitianu panijiaca. Rimiaa-
catujurijiaariuhuj. ³⁰ Nojoriiri sacuaraatia se-
quejojua narta pueya. Nojoriiri Pueyaso niquiniu
paniyashijiaca. Nojoriiri tamasaca soojeaca. No-
joriiri tama na cuaqueyajaaja jiyatequiaa juhua
socua maninia pueyara tamasacajiniji. Nojoriiri
najuhuana sequeja: “Janiya maninia miijiani”.
Nojoriiri jiyanohua niishijiaca, niishishoo sesa
casaa na miiniuria. Nojoriiri na queya to-
jiyashijiaca. ³¹ Nojoriiri seetanujuanaa mosanu-
cua Pueyaso na tojitiaaquiniuucua. Nojoriiri
saaja tama na rupaajaaja jataja. Majaari na
sequesano na miiniu. Nojoriiri narta pueya
paniyashijiaca. Majaari nojori niishiniu jiyano-
niu. Majaari nojori niishiniu taraajenu narta
pueyacua. ³² Nojoricuaajaari tariucuacaanu naa
Pueyaso sequesano niishiya: “Cante naa sesa mi-
ijiacani, cuara puecoosaaria”. Naajaa, nojoriiri
saaja sesa miiquiaa juhuajaniya. Majaari no-
jori quiniu shuquiriaatia saaja tama nojori mi-

ishacarijiaaja sesa, nojoriiri shuquiriquiaajuhuaaj
tamasaca jaara sesa miiri juhua nojori.

2

Pueyasoori sesa miijiaca saniitionutaniya sesa nojori miiniuucua

¹ Naacuaajitij pueyanaa, niaa jaara tamonuucuaara tonujujua quiriquia, majaari nia jyaniniu niaari sesa miyashijiaca cutara. Niaa jaara tamonuucuaara tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijiuhuaaj.

² Paacuaajaari niishiyani, Pueyasoori puetunu sesa miijiacajanaa saniitionutaniya, maninia na niishishacari nojori miijosano.

³ Quiajaniya saniniuujia, quiarta pueyacuara tonujujanaa, majaari quenaaja quia jyaniniu quiaa saniitioyaquishaanutaniya. Quiaari saniitiosaanutaniyajuhuaaj.

Quiaacuajaari juhua nojori, sesa miijiajuhuaaj. ⁴ ¿Majateeri

quia niishiniu, Pueyasocuaajaari pueyaracaanu quia sashiquiaa juucua, quioojia quia tacatonuhuaara nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhuaaj. ¿Quiaateeri jyaniquiaa

Pueyasoori naa maninia quia miiquiaa, maninia quia quiniuucua na niqiiara? ¡Maja! ⁵ Quiaari

quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori

seetanujuanaa maninia saniitiojua. ⁶ Pueyasoori puetunu pueyajanaa miiniutianiya taa nojori miishano quiquiaari mijiriacuajani. ⁷ Naacuajitij, Pueyasoori maninia miijiaca jiyatenutaniya pueyaracaanu rishijiacara. Nojoriiri pueyaracaanu maninia miijiaca quiquiaari mijiria, Pueyaso timitiasano nojori quiniuria, shaajeyashijiaca nojori quiniuriajuhuaj. ⁸ Saniniuujia, Pueyasoori na tojiyashijiaca saniitionutaniya jiyanohua na juaaniutia. Naa saniitiosaanutaniyajaariuhua noo pojori, canapuate saaja sesa miiniu panijiaca quiquiaarini. ⁹ Puetunu sesa miijiaca pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani. ¹⁰ Saniniuujia, Pueyasoori puetunu maninia miijiaca pueyapuejanaa miiniutianiya maninia, taa maninia miijiaca Judiocuaca miishaanutaniyacuaani. Pueyaso timitiasano pueya nojori quiniuucua, nojoriiri jiyanohua shuquiriaatia quijiaca quiniutianiya pueyaracaanu. Naacuajitij, nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimiajata na miiniu quiniutianiya taucuaca, Judiocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. ¹² Naacuajitij, pueya jaara Pueyaso rootasano Moisés niishiyashijiaca quiriquia, naajaa, nojori jaara sesa miijiaca quiri, nojoriiri saniitiosocoriquiano. Naajuhuj, pueya jaara Pueyaso rootasano Moisés niishijiaca quiriquia, nojori jaara na tojiyashijiaca

quiquiaarijihuahaj, nojoriiri cuno Moisés Naajioneejiniji nequesoreesaanutaniya na tojitiaaquiniuucua. ¹³ Majaari nia jiyaniniu niaari jiyanooshaanutaniya sesa nia miishanojiniji nareja najuhuana nia tojishacari Moisés Rootasano. Niaari jiyanoyaquishaanutaniya maja seetanujuanaa na tojjiaca nia quiniuucua. Noo pojori cutaraari jiyanooshaanutaniya, canapuate seetanujuanaa na tojjiacacuajani. ¹⁴ Moisés Rootasano jiitiaashijiaca pueya jaara tamajaaja maninia miiniu niishijiaca quiriquia, naacuajitij, niishishiyari, nojoriiri tamajaaja maninia miiniu niishijiaca cutara. ¹⁵ Naa maninia miiniu niishijiaca nojori quiniuucuatej, niishishiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinijia”. Naajuhuj, nojori jaara maninia miiri, tama nojori jiuujiajaarijia nojori niishitiya: “Maninia miiriinijia”. ¹⁶ Naacuajitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuaru tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojiniji.

Pablo nacasusacari Judiocuaca nojori tojiti-aaquiniuucua Moisés Rootasano

¹⁷ Cuarta Judio pueyanonaa, quiaari jiyaniya quiaa Pueyaso pueyano cutara,

na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. ¹⁹ Quiaari sequequiaajuhuaaj: “Janiyacuaajaari seetanu rupaajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani. ²⁰ Janiyari niishiyashijiaca niishitiojuani, naatujoorinio, maninia cua niishishacari seetanu rupaajanaa Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miijia quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? ²² Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinijicuaraarini? ²³ Quiaari sequequiaajuhuaaj: “Moisés Rootasanoori jiyanohua maninia. Na timitiaanijia”. Naajaa, quiaari Pueyaso rerequetequiaa

quia tojiyaquishacari Moisés Rootasano.
 24 Cunora, tariucuacaanu Pueyaso Rupaajinia
 naajiotasanoori seetanujuanaa naa sequeya:

“Pueyaso niishiyashijiaca taucuacaari Pueya-
 soocuara rimiaaquequiaa sacuaraatia,
 Pueyaso tojiyashijiaca nia quiniuucua
 nojori niquiara”.

25 Cuarta Judiocuacanaa, Pueyasocuaajaari pa
 supuetanaa rootaquiaari pa cararaatiuuquia co
 cuara miatesano quiiria, na saquiriojosano
 pueya pa quiniuucua. Naacuajitij, nia
 cararaatiuuquia co jaara miatesano quiri,
 cunoori maniniacuaja, niaa jaara seetanujuanaa
 Moisés Rootasano tojijiaca quiri. Saniniuujia,
 niaa jaara Moisés Rootasano tojiyashijiaca
 quiriquia, niaari juhua miatesoo quiyajaa
 Pueyaso niquiara. Nia cararaatiuuquia coori
 najuhua miatesano quiya. 26 Saniniuujia,
 taucuaca jaara maninia mijiaca quiri taa
 Moisés rootasano sequeyacuajani, miatesoo
 nojori cararaatiuuquia co quishacari, naajaa.
 Pueyasora, nojoriiri juhua miatesano quiya,
 na muerasu nojori quiniuria. 27 Naacuajitij,
 na cararaatiuuquia co miatesoo tahue jaara
 maninia mijiaca quiri, taa Moisés Rootasano
 sequeyacuajani, nojuajaari jiyanooshaanutaniya,
 Pueyaso muerasu na quiniuria. Quiajaniya
 saniniuujia Judio pueyanonaa, quiaari Moisés
 Rootasano niishijiacuaja. Quiaacuajaari quia
 cararaatiuuquia co miatesanoraca. Naajaa,
 quiaa cutaraari saniitiosaanutaniya quia
 tojiyaquiniuucua Moisés Rootasano. Naacuajitij,
 cuno tahueri quiocuara tonujuriquiano

saniya, Judio pueyanonaa. ²⁸ Pueyasocujaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojjia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari niajanijatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaaraarini? ¿Paateeri najuhuana Pueyaso saquiriojosano Judiocuacani?” ² Maja, Judiocuacanaa. Maniniacuajaari pa quishacari Judiocuaca. Pueyasocujaari Judiocuacaacua tiuuquiaari nojori jitianura na rupaa. ³ Noojiaqueya Judiocuacajinijinio jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhuj? ¡Maja! ⁴ Puetunu pueyajanaa

jaara sapojonuujuaca quiriquia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiri naa naajiotasano quiya tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujanaa cutara. Naajuhuaaj, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniuucua pueyaracaanu”.

⁵ Pa supuetanaa tiuyaquiniuucua seetanu Pueyaso rupaacuajanaa, naacuajitij, mijiria quiniaa pueyari niishiya, Pueyasoori socua jiyanoohua maninia pueyajiniji. Sesa pa miiniuujiniji, paari niishiyani Pueyaso cutaraari jiyanoohua maninia. Naacuajitij, nojuaja jaara pa saniitiore sesa pa miiniuucua, ¿taa nia sequeyani? ¿Nojuajate sesa, jaara pa saniitiore sesa pa miiniuucua? ¡Juaj! Juhua niishiyashijia pocuareenijia. ⁶ ¡Seetanujanaa, Pueyasoori sesa miyashijia! Nojuaja jaara sesa mijia quiriquiajuhuaaj, ¿maatucua taa mijiria quiniaa nequesoreereni?

⁷ Tamasaca naasucuaari sequequiaa: “Sapojua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiitiaja. Naaratej, ¿Pueyasotucua casaara cua saniitioreni?” ⁸ Teyano pueyanote naa sequejani, nojuaja naasucuaari naa sequejajuhuaaj: “Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori”.

Tamasacaari canaacuara tonujuquiaa najuhuanaj, canaanaari naa niishitiojoquiaani. Canapueete naa saPONUUQUIAA canaacuarani, nojori saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa miiji-acani

⁹ Quiarjia, jaara naa quiriritij cuarta Judiocuacanaa, ¿paateeri socua maninia miijiaca taucuacajiniji Pueyasorani? Maja. Janiyacuajaari shushania pohuatariquiaani, puetunu mijiria quiniaa pueyajanaari sesa miijiaca; Judiocuaca, taucucanio. ¹⁰ Tariucuacaanu Pueyaso Rupaajiniacujaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa.

¹¹ Majaari quenaaja maninia niishiriojojua pueyano quiniu. Majaari quenaaja Pueyasocua jiaatiaja pueyano quiniujuhuaj.

¹² Puetunu pueyajanaari Pueyasocuaaji tashuquoorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa.

¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa saPONURAJA. Cuno pojoriiri juhua soconu noonacu jiiitaa na rupaama, rimiaacatujuri nojori quiniuucua. ¹⁴ Nojori jaara pocuare, saaja tamasaca sesacaquiaari, puera juaajia nojori quishacari. ¹⁵ Nojoriiri puecojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa

sesojua, narta pueya taraajetejajuhuj.

¹⁷ Majaari nojori niishiniu jiyanooniu.

¹⁸ Nojoriiri juhuajaniya miiquiaa sesa saaja. Majaari na pueretunu Pueyaso”.

¹⁹ Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijiaca. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucuacanio. ²⁰ Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijiara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijiara pa jatanishaanuni. Moisés Rootasanojinia, tariucuacaanu Pueyaso sequenu panishano caminiuujuniaa naajionuutasanojiniaari naa sequeyajuhuj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaca quiri.

²² Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucuacajuhuj, Pueyasoori puetunujuanaa jiyanooquiaa Neyanuucua nojori tiuushacari. Majaari rimiajata na

jiyanooniu. ²³ Puetunu pueyajanaari sesa miijiaca; Judiocuaca, tucuacanio. Naacujitij, nojoriiri juhua tucuacaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacujitij, pueyari Pueyaso timitiasoo quiquiaari. ²⁴ Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusonuucua pocuara. Naacujitij, Pueyasoori pa jiyatequiaari juhua sesa miyashijiara. ²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacujitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhuj, Pueyaso saniitioyaquishacari tariucuacaanu nocua tiuujia pueya Jesu cusoyaquishacarijia, majaari najuhuana puera jiuujiaajia na quiniu quiquiaari. ²⁶ Pueyasoori niishiquiaari Neyanu Jesucristoori nojoriicuara mosocoriquiano, sesa nojori miijiosano tuujusaanura seetanujuanaa. Naaratej, nojuajaari pueyaracaanu sesa nojori miijiosano rejeretaquiaari saaja. Jesucristo cusonuucua quiari naataja pocuara, paari niishiyani, Pueyasoori seetanujuanaa maninia miijia. Nojuajaari maja najuhuana na jiyanooniu pajaniya. ¡Neyanu motequiaari pocuaraari!

²⁷ ¿Teyano niajanijiniote tojetaaru-cujanaa saaja maninia miijiani? Shaaqui. Naacujitij, maninia miyashijiaca pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniuujia,

paa jaara puetunu Moisés Rootasanojuanaa tojitiajaca quiriquia maniniani, paa maara tama pa cuaqueyajaaja shuquiritiajaca quiriquia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitianu tama pa miishanojuaja pa shuquiritiasocoriquiano.
²⁸ Naacuajiti paari niishiyani, Pueyasoori pa jiyanoojia puetunu sesa pa miishanojinijijianaa saaja Jesucristoocua pa tiuushacari. Majaari na jiyanooni pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuajaari puetunu mijiria quiniaa pueyapuejanaa Jiyano.

³⁰ Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacara, socua tamonu Pueyaso taucuacara. Naaratej, puetunu pueyapuejanaari jiyanooshaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacanio.

³¹ Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuara Jesucristoocua tiuuria, jiyanooshano pa quiniuria.

4

Pueyaso jiyatesacari Abraham juhua sesa

miyashijiara

¹ Naaratej cuarta Judiocuacanaa, ¿taa nia sequeya pa supuetana Abrahamjinijini?

² ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari. ³ Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasoocua tiuquiaari. Naaratej, Pueyasoori na jiyatequiaari juhua sesa miyashijiara”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqutiojua. Jaara niq-uitiosaare, cuno cumaneecaari maja nareja niq-uitiosano. Cunoori seetanujuanaa na poonijosano-jiniji. ⁵ Saniniuujia, maninia miyashijia jaara Pueyasoocua tiuuri, Pueyasoori na jiyatenutaniya juhua sesa miyashijiara saaja nocua na tiuuniu-ucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiara, maninia miyashijia pa quishacarijia. Naa naajiotasaaquiaariiri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanoya sesa na miiijosanojinijicujani, Pueyaso jaara tuujure sesa nojori

miiijosanojuhuaj. ⁸ Shuquiriaatia quijiacaari noo pueyajuhuj, puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooniu panijia, noo pojori canapuate na cararaatiuuquia co miatesano jiiitiaani, taa nojori supuetana Abrahamcuaani? ¿Taa nia sequeyani? ¿Taucuacaarijiaataj? ¿Nojoriti jiyanooshiyajuhuj? ¿Taaquiririnij! ¹⁰ ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuajaari na jiyanooquiaari miatesoojua na quishacari. ¹¹ Na tiuuniu nuhuaji Pueyasoocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasoocua na tiuushacari, Pueyasoori na jiyatequiaari juhua sesa miyashijiaara, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquiaaricuaani, Pueyasoori nojori jiyateya juhua sesa miyashijiaa nojori quiniuriajuhuaj, mariyata juhua Abraham niquiohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjuhuj. ¹² Naajuhuj, pueya jaara na cararaatiuuquia co miatesano quiri Judiocuaca nojori quiniuria,

naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niquiohua nojori quiniuriajuhuaj.

Pueyaso sequesano Abrahamni, cunoori Jesucristoocua tiuuiacarajuhuj

¹³ Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaanu quiquiaari Moisés Rootasano tojjijia na quiniuucua. Jiyacaritij, Moisés Rootasanoori maja na quiniu quiquiaari juhuanujuaja.

¹⁴ Pueyaso sequesano Abraham jaara saaja Moisés Rootasano tojjiiacara quiriquia, na sequesano maara najuhuana quiri Pueyasooocua tiuuijaca pueyara. Naajuhuj, pueya maara najuhuana Pueyasooocua tiuuijaca quiriquiajuhuaj. Seetanujuanaa Pueyaso sequesano Abrahamni, cunoori puetunu Pueyasooocua tiuuiacarajanaa.

¹⁵ Cunoori maja saaja Moisés Rootasano tojjiiacara. Pueyasocuaajaari niishiquiaari, pueyari maja na naata Moisés Rootasano tojiniu quiniutianiya puetunujuanaa. Moisés Rootasanojiniji, paari niishiyani, paari saniitiosaanutaniyani pa tojitiaaquiniuucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijjaca”.

¹⁶ Pueyasoori tariucuacaanu na sequesano Abraham nareja niqutionu paniquiaari,

puetunu necohuarajanaanio. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujiaa. Naacuajitij, Pueyaso sequesanoori maja saaja Moisés Rootasano tojijiacara. Cuno sequesanoori puetunu pueyapuerajanaa, canapuate Pueyasooocua tiuujiaa quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujiaa pa quishacari taa Abraham tiuquiaari Pueyasooocuaani, paari Abraham niqiuohuani. Naaratej, Pueyasora, Abrahamri pa que. ¹⁷ Pueyasocujajaari naa sequequiaari Abrahamtej nojuajaari queraatia niqiuohuaraca quiriqiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarjia quia jiyateree queraatia tamaatia rupaaca pocujaca que quia quiniuriani”.

Abrahamri Pueyaso sequesanoocua tiuquiaari. Nojuajaari niishiquiaari Pueyasoori macunucua samiitianijia. Niishiquiaarijiaarihuaj, Pueyasoori cumaacaraca na panishano na shipininiuria shaaquijiniji.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquiaari. Naacuajitij, nojuajaari seetanujuanaa queraatia tamaatia rupaaca pocujaca pueyapue que, taa Pueyaso sequequiaari nojuacuajani. Pueyasoori naa na sequesaniaari:

“Quia niquiohuari tojetaarucujanaa queraatia quiriquireano”.

¹⁹ Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuj, naajaa, majaari na tarinitianu quiquiaari Pueyaso sequesanoocua tiuuniu.

²⁰ Saaja Pueyaso sequesanoocua na tiuushacari, nojuajaari maja noojia na niquijiotenu quiquiaari. Majaari Pueyaso sequesanojiniji na taacanuunu quiquiaarijuhuaj. Saaja Pueyasoocua na tiuushacari, nojuajaari noojia cumaquiquiaari socua. Naacujitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishyanijia quiaari canaa muetutenutaniya taa quia sequecanu janiyacujani. ²¹ Quiaacujajaari cumaacaraca quia miiniuria puetunu quia sequesanojuanaa”. ²² Naa Abraham tiuuniucua Pueyasoocuatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijiaara”, cunoori maja saaja Abrahamra sequesano. ²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuj, nocua pa tiuushacari, pa niishishacarijuhuaj nojuacuajajaari pa Jiyaniijia Jesucristo samiitianiquiaariuhua macujiniji. ²⁵ Pueyasocuajajaari mijiria na jiyaroquiaari sesa pa miishanoocuarara mosocoriquiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijiaa.

5

Jesuucua tiuuniaa pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niquiarani. Jesucristoori na Que pa jiyanootiquiaari, pocuara na cusosacari. ² Jesucristoocua tiuujia pa quishacari, Pueyasoori pa timitiaquiaa. Pa cumaquiquiaajaariuhuj maninia necohua pa quiniuria. Paari shuquiriyajaacuhuj, pa niishishacari paari jatanishaanutaniyani, shacantuuca quijiaca pa quiniuria juhua nojuajuhuj. ³ Majaari saa cunojua. Paari shuquiriquiaajuhuj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhuajaniya rejeretajaca quiniutianiyani. ⁴ Naa rejeretajaca pa quishacaritij, paari cumueeca Pueyaso muerasu quiniutianiyani. Naa cumueeca Pueyaso muerasu pa quishacaritij, paari juhuajaniya sashijia quiniutianiyani, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. ⁵ Naa pa niishishacaritij, majaari sapojosano pa quiniu quiniutianiya. Pueyasocuajaari tari jiyaroquiaari na Sohuanu, poojiajania quiriquiano, seetanujuanaa Pueyaso paniniu pa jitianura poojiajania.

⁶ Pueyaso tojiyashijia pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na

jiyanootiniuria pajaniya. ⁷ Sesa miyashijia pueyano jaara monu panishiya juucua, ¿tamonu maninia pueyanoteeri quiya na sequenura: “Janiya cuaara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupuena pueyano jaara jiyanojua na panijia quiri, nojuaja maara sequere: “Janiya cuaara na niti mosaaria juhuari”. ⁸ Saniniuuja, sesa miijiaca pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanojua pa panijia. ⁹ Quiarijia, paari sesa miyashijiaca quiya Pueyaso niquiarani, Jesucristo cusonuucua pocuara. Naacuajitij, paa cutaraari niishiyani, Pueyaso saniitiosacari na tojiyashijiaca pueya, Cristoori pocuaji tacunutaniya cutara, tariucua na jatanishano pueya pa quiniucua. ¹⁰ Na paraa pa quishacarijia, Pueyasocuajaari pa jiyanoquiaari, Neyanu cusonuucua pocuara. Quiarijia, nata jecatoono pa quishacari, Neyanuuri saminio quiya pueyaracaanu pocuaji na tacunura. ¹¹ Majaari saaja cunora shuquiriaatia pa quiniu. Paari shuquiriyajuhuj, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusonuquiaani? Juhucatecara pa supuetana Adán miiniucua sesa, naaratej puetunu pueyajanaari sesa miijiacajuhuj. Pueyasocuajaari tari sequequiaari: “Cante sesa

miiijiani, cuaara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiaca pa quiniuucua. ¹³ Moisés Rootasano quiyaquishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriicuara saquirojotasaanu quijia sesa nojori miishacari. ¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesanicuaani. Naajaa, puetunu nojori-jianaari cusunuuquiaarijihuaaj sesa miijiaca nojori quiniuucua, sesa miijia Adáncuajinio nojori supenuucua. Quiarijia saniniuujia, nia pohuatareera Adán miishanojiniji, Jesucristo miishanojinijinio.

¹⁵ Adán miishanoori jiyanohua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara. ¹⁶ Pueyaso miishano maninia pajaniyarani, cunoori sesa Adán miishano shocotaa jiyanohua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoquiaa puetunu sesa pa miishanojinijijianaa. ¹⁷ Niquiriyatu pueyano miiniuucua sesa, puetunu pueyajanaari cusunuujuacara quiquiaari. Saniniuujia, niquiriyatu pueyano miiniuucua maninia

pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhuj, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhuj, Jesucristo miiniuucua maninia, puetunu pueyajanaari na naata jiyanooshaanu, nojori saniitioy-aquishaanuucuj, pueyaracaanu quijiaca nojori quiniuria. ¹⁹ Adán tojiyaquiniuucua Pueyaso sequesano, puetunu pueyajanaari sesa miijiacara jiyatesaaquiaarijuhuaj. Saniniuujia, Jesucristo tojiniuucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquiohua.

²⁰ Moisés Rootasano jaara niishishaaquiaari, pueyari socua sesa miijiacara jiyacatequiaari. Naa socua sesa miijiacara pa quishacaritij, naajuhuj, Pueyasoori socua jiyacatequiaari pocua taraajenujuhuaj. ²¹ Sesa miiniu tarinitianu niishiyashijia pa quiniuucua, puetunu pueyajanaari csonuuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacujitij, nojuajaari juhua pa samiitianijioquiaarihua, pueyaracaanu rishijiaca pa quiniuria pa Jiyaniijia Jesucristota.

6

Pablo niishitiojosano moojinia tiuquinijionu-jiniji

¹ Pueyaso jaara naa pa jiyanooquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiyani, pueyaracaanu Pueyaso jiyanooniuria pajaniya, pueya niishiniuria, Pueyasocuaajaqui jiyanhua maninia na jiyanooniuria pajaniya? ² ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuaajaari tari cusonuquiaari Jesutani. ³ ¿Niaateeri cuno niishiyaquiyajaa? Naajuhuj, paa jaara moojinia tiuquinishaare Jesucristoocua pa tiuushacarini, Pueyaso niquiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacaritij, paari juhua Jesuta jamoshiyajuhuj. Naa juhua macu pa quishacaritij, paari samiitianijosanohuani, taa Jesucristo samiitianishaaquiaariuhua macujiniji jiyanhua Pueyaso cumaacatacuaani. Naa samiitianijosanohua pa quishacaritij, maninia miijiacu pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cusosacarini, naajuhuj, paa cutaraari tari samiitianijosanohua juhua nojuajani, maninia quijiaca pa quiniuria.

⁶ Tarijia, majaari pa naata tarinitianu

quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jiiitianura, sesa na miitiniuria pajaniya. ⁷ Naacuaajitij, sesoriquia poojia seque jaara tari jatanishano quiya, majaari tari sesa miijiaca pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹ Cristocuaajaari samiitiaquiaariuhua. Paari niishiyajuhua, majaari socua na pacutenu quiniutianihua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. ¹⁰ Majaari socua Jesucristo pacutenu quiniutianihua cusonu, sesa pa miishanoocuaara. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhuaaj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijiuhuaaj, niaacuajaari Jesucristota samiitiaconohua, Pueyaso tojijiaca nia quiniuria.

¹² Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujuanaa nia niyajetare tama nia cuaqueya panishanojuaaja nia miyaquiniuria.

¹³ Majaari nia cuaqueya nia panitianu sesa nia

miiniuria, taa na paniya nia miiniuria juucuacua-jani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiitiacoquiaariuhua juhua macunucua nia quiniuujini. Naacuajitij, nia cuaqueya nia jiyatere saa maninia miijia na quiniuriaja. ¹⁴ Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojiti-ajaca cutara, maja tari Moisés Rootasano tojijiaca.

Pueyaso tojiyashijiaca pueyani, nojoriiri Sesaaca pueya

¹⁵ Cua sequesacari niajaniya, pajaniya maja tari Moisés Rootasano tojijiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa!
¹⁶ Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojijia quiniutianiyani. Naajuhuaaj, niaa jaara sesa miijiaca quiriohua, niaari Sesaaca tojijiaca. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojijiacara quiri, niaari sesa miyashijiaca quiniutianiya. ¹⁷ Tarijia, niaari Sesaaca tojijiaca quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniuucua Jesucristo rootasano puetunu nioojiatajanaa, taa nia niishitiojosaaquiaaricujani. ¹⁸ Jesucristo rupaa nia tojishacari, Pueyasoori nia jiyatequiaari

na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojjiacara jatanishano, saaja maninia miijiaca nia quiniuria. ¹⁹ Janiyari naa pohuataa serujiniji nijaniyani, maatia nia tojiniuria cua niishitiojosano. Majaari juhuanojuaja nia naata puera jiyajeneta niishitiojosano niishiniu, cumueeca Pueyaso muerasu nia quiyaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanohua sesa miijiacara jiyatequiaari. Naajuhuj, quiarjia saniniuujia, tama nia cuaqueyajaaja nia jiyatere Pueyaso panishano nia miiniuria. Niaa jaara naa miiri, niaari tojetaarucujanaa maninia miijiaca quiniutianiya Pueyasora.

²⁰ Niaa jaara sesa miijiaca quiquiaarijia Sesaaca tojjiaca nia quishacarijia, niaari juhuajaniya Pueyaso tojiyashijiaca quiquiaari.

²¹ ¿Sesaacate maninia nia miiquiaari sesa nia miiniuucua nera? ¡Maja! Niaa cutaraari saaja caririquiquiaa sacuaraatia casaa nia miiniuucua tarijia. Niaari quiarjia niishiyajuhuj, cante sesa miijiaca quiquiaani, nojoriiri shaajasaariquiano.

²² Naa sesa miyashijiaca nia quishacari quiarjia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjiaca nia quishacaritij, nojuajaari nia jiyatenutaniya seetanujuanaa maninia miijiaca nia quiniuria. Naacuajitij, niaari pueyaracaanu shuquiriaatia rishijiaca quiniutianiyajuhuj. ²³ Saniniuujia, sesoriquia pueya miiniuucua sesa saaja,

nojoriiri naa na miiniuucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijia pa quiniuria, pa Jiyaniijia Jesucristo rupuejaca pa quishacari.

7

Paari juhua camishanoni

¹ Pueyanaa, niaacuaajaari Moisés Rootasano niishijia. Niaari niishiyajuhua, paa jaara shaajequeeni, paari jiyacari Moisés Rootasano cartequese shushani. ² Naajuhua, paacuaajaari rootasaaquiaarini, maaji jaara camishano quiri, cuara tamonu cayata quiyaquiria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. ³ Saniniuujia, maaji jaara tamonu pueyanota quiri quia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

⁴ Niaari naajuhua pueyanaa. Jesucristo cusonuucua pa niti, niaari juhua cusonu-uquiaarijuhua, maja Moisés Rootasano tojiijia nia quiniuria socua. Naacuajitij, niaari tamonu tojiijia quia cutara. Nojuajaari pa Jiyaniijia Jesucristo, nooj, macujiniji samiitiaquiaarihuatej. Naacuajitij, quiarijia pa

Jiyaniijia Jesucristo tojijiaca pa quishacari, paari maninia miijiaca Pueyasorani. ⁵ Tarijia, Pueyaso tojiyashijiaca pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniuuiuquiaari sesa pa miiniuria. Naacujitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶ Tarijia, paari juhua quioosano pueya Moisés Rootasano tojitishaaquiaarini. Saniniuujia, Jesucristota pa cusonuucua, nojuaja jaara pocuara cusoquiaari, paari tari Moisés Rootasano tojiniu cartequiaarini. Moisés Rootasano pa tojiyaquishacari quiarijia, naacujiti pa naata Pueyasojuanaa tojiniu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitiajaca quiquiaari maniniani, pa puerenuta paa mariqui saniitiosaareeri pa tojiyaquiniuucua niquiriyatu queraatia na rootasanojiniji.

Poojiaari saa sesa miiniu niishijaja

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jiyanojia maniniacujiaari Moisés Rootasano. Moisés Rootasanojiniji, paacujiaari niishiyani paari sesa miijiacani. Moisés Rootasano jaara quiyaquiriquia, janiya maara niishiyaquiquiaarini, cua jiaatiasacari tamasaca jiiitiasano casamiicua, cunoori sesa Pueyasora. ⁸ Saniniuujia, Moisés

Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacuajitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹ Moisés Rootasano cua niishiyaquishacarijia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jiyanhua taraajequiaarini, cua niishishacari janiyari jiyanhua sesa miijia Pueyaso niquiarani. ¹⁰ Naa sesa miijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijijianaa. ¹¹ Naacuajitij, janiyari jiyanhua jiyajenequiaarini, cua jiyanihacari cua naatacuaja Moisés Rootasano tojiniu maninia, Pueyaso jiyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiquiaarini Pueyasoori cua jiyanoyaquiniutianiya.

¹² Seetanujuanaa nia sequeyanijia pueyanaa, Moisés Rootasanoori jiyanhua maninia. Tojetaarucujanaa maninia rootasano. Cunoori

seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanohua sesa Pueyasora. Naacujitij, paari Moisés Rootasanojiniji niishijiani, paari puetunujuanaa jatasocoriquiano quijia juucuan, seetanujuanaa sesa miijiaca pa quiniuucua.

¹⁴ Paacujaaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosanocujaaari pa tojishocoriquiano puetunu poojiatajanaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojinuu. ¹⁵ ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶ Janiya jaara cua panishoo sesa casaa miirini, naacujitij, janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja. ¹⁸ Quiarjia niishiya cutaranijia, coojiaari tojetaarucujanaa sesa miiniu niishijia. Naacujitij, janiyari juucua maninia miiniuucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacujitij, cua miishanoori maja maninia, taa cua miiniu

paniquiaa juucuacuajani. Cua miishanoori saaja cua miiniu paniyaquishoo quiquiaa. ²⁰ Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaaja, majaari tama cua miiniu panishanojuaaja.

²¹ Quiarijia niishiya cutaranijia, janiyari naa sesa miijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniuucua jiaatiaquiaa juucuanijia. ²³ Janiyari niishiyajaaniuhuaaj, coojiaari juhua cua niishitiaja paraca quiya. Naacuajitij, cua niishiriojosacari, “Maninia miiniutianianijia”, coojiaari saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

²⁴ ¿Taa cua miiniutianiya socuaarini? ¡Tojetaarucuajanaa taraatia quijianijia! Pueyaracaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacaritij? ²⁵ ¡Pueyaso shuquiritiaanijia cua niishishacari, nojuacuajaari cua Jiyaniijia Jesucristota cua jataniniutianiya tojetaarucuajanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojijia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

8

Pueyaso Sohuanu pa tojishacari, paari maninia miijia quiniutianiyani

¹ Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacujitij, paari tojetaarucujanaa jiyanooshano quiyani. ² Puetunu pueyajanaari cusuuriquiano quijia, sesa miijiaa nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaa pa quiniuria. Naacujitij, majaari tari sesa miijiaa pa quiniu pa saniitosaanura. ³ Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaa pa quiniuucua. Naaratej, Pueyasoori Neyanujanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacujitij, Jesucristo jiitiasacari juhua pa cuaqueyajuhaaj, Pueyasoori juhua sesa miijiaa na jiyatequiaari, pa niti na saniitiosocoriquiano. ⁴ Naacujitij, Pueyaso Sohuanu pa jiitiasacari quiarijia, pa naata maninia miijiaa quiniu, taa Moisés Rootasano sequeyacuajani. Pueyaso Sohuanu tojijiaa pa quishacari, majaari tari pa quiniu sesa miijiaa, taa pa quiquiaari tarijacuajani.

⁵ Canapuete tama na panishanojuaaja miiquiaani, nojoriiri tama na cuaqueyajaaja shuquiritiniuria jiaatiaquiaa. Saniniuujia, canapuete Pueyaso Sohuanu tojijiaa cutarani, nojoriiri saaja Pueyaso shuquiritiniuria

jiaatiaquiaa. ⁶ Tama na cuaqueyajaaja shuquiritiniuria jiaatiajacaari saaja shaajecoriquiano cutara. Saniniuujia, Pueyaso shuquiritiniuria jiaatiajacaari pueyaracaanu rishiriquiano cutara. Nojoriiri juhuajaniya shuquiriaatia quijiacajuhuj. ⁷ Cante tama na cuaqueyajaaja shuquiritiniuria jiaatiaquiaani, nojuajaari Pueyaso paraca. Majaari Pueyaso tojijia na quiniu paniniu. Seetanujuanaa majaari na naata Pueyaso tojijia na quiniujiuhuj. ⁸ Naacujitij, canapuate saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniu.

⁹ Niajaniya cutaraari maja nia quiniu juhua cuno pojorijia, tama na cuaqueyajaaja shuquiritiniuria jiaatiajacani. Niaa cutaraari Pueyaso shuquiritijia, Pueyaso Sohuanu cumaquishacari niajaniya, nojuaja jaara seetanujuanaa nioojiajinia quiya. Cante Pueyaso Sohuanu jiiitaaquiyani, nojuajaari maja Pueyaso pueyano. ¹⁰ Cristo quishacari poojiajinia, pa sohuanuuri tari jatanishano quiya maninia miijiaa pa quiniuria, pueyaracaanu rishijiaa pa quiniuriajuhuj. Pa cuaqueya cutaraari shaajasocoriquiano, sesa miijiaa pa quiniuucua. ¹¹ Naajaa, Pueyaso Sohuanu jaara poojiajinia quiya, nojuajaari pa cuaqueya samiitianijionutaniuhua, taa na samiitianiquiaariuhua macujiniji Jesucuaani.

¹² Naa Pueyaso miishacari maninia pajaniyatej, maninia miijiaa pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu

tari, taa pa miiquiaari tarijiacuajani. ¹³ Cante naa miijiaca quiyajaani, nojoriiri shaajasaariquiiano. Saniniuujia, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaaja, niaa cutaraari pueyara-caanu shuquiriaatia quijiaca quiniutianiya.

¹⁴ Canapuete Pueyaso Sohuanu tojitiajacani, nojoriiri Pueyaso niquiohua cutara. ¹⁵ Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacuaajitij, cuno pa jiiitasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiyaquiniucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni.

¹⁷ Naa Pueyaso muerasu pa quishacaritij, puetunu Pueyaso jiiitasanojuanaari pa jiiitasano quiniutianiyajuhuj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujia pa quiniucua. Paa jaara naquiya miishaare nocuara mijiriani, paari jiyanohua maninia quijiacara jiyatesaanutaniyani juhua nojuajuhuj.

Pueyasoori maninia miiniutianiya na muerasu

¹⁸ Quiaritia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanohua maninia miishaanutaniyani,

pueyaracaanu shuquiriaatia pa quiniuria.
¹⁹ Quiarijiani, puetunu Pueyaso shipinishano casaajanaari pa niqiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuasano na muerasu pa quiniuria.
²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquiaari tama na panishacarijiaaja. Pueyasocujaari naa paniquiaari sesa na quiniuria, na shipinishano pueya sesenucuajuhuj. Naajaa, majaari pueyaracaanu sesa na quiniu quiniutianiya.
²¹ Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jecanujuhuj. Naacuajitij, puetunu Pueyaso shipinijosano casaajanaari maninara quiniutianihua, maja na sesenura socua. ²² Quiarijiani, puetunu Pueyaso shipinijosanojuanaari jiyano hua noojia niojiya taraatia na quishacari. Quiatojiyari juhua maaji noyano, cuara quiariniora jatanishaarejaatijia. ²³ Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhuj, na panishacari tojetaarucujanaa jatanishano quijiaca pa quiniuria. Paacuajaari tari jiiitiaa Pueyaso Sohuanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhuanojua jatanishoojua.

Paari cunora quiatojiyajaani. ²⁴ Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupuenura pa Jiyaniijia. Cunora, paari mijiria taraatia pa quishacari juhuajaniya rejeretaquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuajitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuajaari poojiajiniji Pueyaso secojoquiaa pocuara. Jiyanojua na secojosacari pocuara, jiyasohua quiatojiya poojiajiniaari. ²⁷ Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanjia cutara

²⁸ Paacuajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu cuno miishanojuanaa jiyatequiaa

saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhuaaj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaaj. Naa sequequiaariiri Jesucristo quiniuria pa puerana, queraatia tapueyocucaraca na quiniuria. ³⁰ Naacuajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuaaj, Pueyasoori cuno pojori niishitiquiaa nojori tiuuniuria Neyanuucua. Jesucristoocua nojori tiuushacari, Pueyasoori nojori jiyatequiaa juhua sesa miyashijiacara. Jiyanoshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyanojua pa panijia. Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarjia niqutioyaquiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuanaacuajaari pa jiyatequiaari juhua sesa miyashijia pa quiniuria. ³⁴ Jesucristocujaari tari cusoquiaari pa niti. ¿Cantucua saniniuujia quiarjia Pueyaso sequeriquia pocuarani: “Cuno

pojori quia shaajare”? Pocuaji Tacunacuajaari samiitiaquiaariuhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. ³⁵ Nojuajaari

jiyanohua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiya, paa jaara taraatia miishiyani, paa jaara casaacua tacayani, tamasa jaara naquiya miya pajaniyani. Naajuhuj, paa jaara quera titiacoya pa miaajenutani, majaari nia jiyaniniu Cristo pa paniyaquiyani, naajuhuj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuj. Puetunu niojuanaari maja na tarinitiniu Jesucristo, na paniyaquiniuria pajaniya.

³⁶ Paacuajaari taraatia miishocoriquianoni, naatej, taa tariucuacaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniuucua. Nojoriiri juhua miaquesocoriquiano borregohua canaa puecooquiaa juhuajaniya”.

³⁷ Paari naa miishaaquiaajaaniuhuj. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequiaa maninia na jeecanura pajaniya, juhua nojuaja pa quiniuria socua. ³⁸ Seetanujuanaa

niishiyaniija, Pueyaso panishacari jiyanoehua pajaniya, majaari quenaaja tamonu casaa na naata rupatanu pajaniya Nojuajiniiji. Paa jaara quiri saminiojuani, macu soj, naajaa, pa panijia Pueyasocuajaari pata quiyajaa. Naajuhuj, Pueyaso seya, samaruhuanio, puetunu cunojuanaari maja na naata pa rupatanu Pueyasooquaji. Naajuhuj, majaari quenaaja tamonu cumaacaraca quijiaca na naata pa rupatanu Pueyasooquaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio.
³⁹ Naajaariuhuj, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuj. Naacuajitij, pa Jiyaniijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniiji.

9

Pueyasojuaanaari pueya saquiriojojua na pueyara

¹⁻³ Naa Pueyaso pueyano cua quishacaritij, janiyari jiyanoehua cuarta Israel pueyacua taraajequiaani, nojori tiuyaquiniuucua pa Jiyaniijia Jesucristoocua. Janiyari pueyaracaanu nojoriicua taraajequiaa jiyanoehuanii, maja cua naata quishacari cuarta Israel pueya tiuutiniu Jesucristoocua. Seetanujuanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniniacuajaari naa cua miishaanura. Nojori jaara na naata

quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajaniyatej, janiyari coojiajinia niishiyani, seetanujuanaari cua sequesano. Pueyaso Sohuanuuri cua niishitiyajuhuj majaari cua sapojonu. ⁴ Cuarta Judiocuacaari pa supuetana Israel niquiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiushacari. Pueyasoori nojori niquitiquiaari shacantuuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuj, Pueyasoori Moisés niquitioquiaari caapiqui saajianeecua na naajiosano, saniniuujia Moisés niishitiojonura tiji nojori. Pueyasoori nojori niishitiquiaarijihuj taa nojori miiniutianiyani, tariucua jiyanooshano nojori rerejonura na niquiara. Pueyasoori nojori sequequiaarijihuj, nojuajaari puetunujuanaa na sequesano Abraham tohuateenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijiajanaa na quiniuria, puetunu casamijianaa jiitiana na quiniurijuhuj. Nojuajaari Pueyasojuhuanajaj, juhua na Quejuhaj. ¡Nojuaja cuara pueyaracaanu maniniuhuaqueetasano quiiria! ¡Cuaara naa quiiria pueyaracaanutej!

6 Quiarijiani, queraatia parta Israel pueyajinijinio pueyari maja Pueyaso muerasu. Naa cua sequesacari nijaniyatej, majaari nia jiyaniniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoririarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. 7 Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocuajaari naa sequequiaari Abraham:

“Cua sequesano quiajaniyari saaja quia niyanu Isaaccuajinio supueno pueyarano quiniutianiya cutara”.

8 Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacuajinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaani. Pueyasora, nojori cutaraari Abrahamcuajinio supueno pueya. 9 Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia

niquio Saara riuriatanutaniuhua tariucua mueyaracani”.

Naacuajitij, Isaac jaara rasaanquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiniojuanaani, saaja Isaacri Pueyaso saquiriojosano pueyano quiquiaari.

¹⁰ Naa quiquiaariijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojjijarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajiniijiiri:

“Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu panyacuajani, tama na miiniu panishanojuaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

¹⁴ Naa Pueyaso miishacari tama na panishanojuaajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja.

¹⁵ Pueyasocujaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooni paniyacuajani. Naajuhuaaj, janiyari pueyanoocua taraajenutaniyani, teyano pueyanoocua cua taraajenu paniyacuajani”.

¹⁶ Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuajaari tama saquiriojoquiaajaaja cana na jiyanooni paniyani. ¹⁷ Naajuhuaaj, tariucuacaanu Pueyaso sequesano Egipto jiyaniijaraari naa naajiotasano quiyajuhuaaj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua miijiosano cua niqitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasajuanaa cutarani”.

¹⁸ Naacuajitij, paari niishiyani, Pueyasoori taraajeja teyanoocua na taraajenu paniyani. Naajaariuhuaaj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹ Naa cua sequesacari niajaniyatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojinijini?”

²⁰ Majaari naa sequenu pueyanonaa. ¿Canteeri quiajaniyani, naa quia juaaniuria Pueyasotej? Paacuajaari na shipinishano pueyani. ¿Taa nia

sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”? ²¹ Paniyojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiariquiano conatunio.

²² Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanohua rejeretaquiaa sesa miijiaca, cante tari saniitiosocoriquiano quiyacuajani. ²³ Pueyasoori naa tarishiyajaara na saniitionura na tojtiaashijiaca pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriqianocujani.

²⁴ Paacuajaari cuno jiyanooshano pueyani, canapue tari Pueyaso saquiriojoquiaaricujani Judiocuacajinijinio, taucuacajinijinionio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyaquiquiaarini, janiyari nojori sequenutaniyani: ‘Niaari cua quiquiohuanijojua’. Naajuhuj, cante cua shuquiritasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhuj:

“Tee cuniqui naa pueya sequesaaquiaaricujani: ‘Niaari maja cua pueya’, nojoriiri cuniqui-

jia jiyaniquishaanutaniya: ‘Niaari Pueyaso niquiohuajanaa cutara’”.

27 Saniniuujia, supuetana Isaíasri naa sequequiaari Jacobo niquiohuacuajinio supueno pueyajiniji:

“Israel pueyari jiyanoehua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. ²⁸ Pueyasoori mijiriara na sequesano tohuateenutaniya. Majaari na tarishiniu quiniutaniya”.

29 Supuetana Isaíascuajaari naa sequequiaari tariji-ajuhuj:

“Pa Jiyaniijia Pueyaso jaara Israel pueya niquiohua jiyanoyaquiquiaari, Israel pueya maara quiarjia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

Judiocuacaari Pueyaso rupaacua tiuyashijiaca saaja

³⁰ Naa cua pohuatasacari niajaniya tariucuaacanu Pueyaso Rupaajinijitij, paari quiarjia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarjia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari. ³¹ Israel pueyari saniniuujia jiyanoehua Moisés Rootasano

tojjiaca juucua, nojori jiyanishacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooni quijia nojori. ³² ¿Niaate niishiya casaara Pueyaso jiyanoyaquiquiaari nojorini? Pueyasoori nojori jiyanoyaquiquiaari nojori tiuyaquiniucua nocua. Nojoriiri jiyaniquiaari tama nojorijiaarijia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuuniu quiquiaa Jesucristoocua. Nojoriiri saaja na sooquiaa. Naacuajitij, Jesucristoori juhua saajia nojoriria, nocua nojori tiuriiniuria. ³³ Jesucristojiniji miriqui Pueyaso sequesano cuajaari naa naajiotasaquiaari tariucuacaanu, Jesucristo niyacarijia:

“Cua tojitiare. Janiyari Sión tuhananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

10

¹ Cuarta Pueyaso muerasunaa, janiyari jiyanohua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniuriajuhuaj. Janiyari jiyanohua nojoriicua tacayani. ² Janiyacuajaari seetanujuanaa niishiyani, Israel pueyari seetanujuanaa Pueyaso panishano miiniu panijiacu juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja

sequequiaa, majana Pueyaso naata pueya jiyanooniü saaja nojori tiuushacari nocua. Naaratej, nojoriiri jiyanoohua saniniujuiquiaa maninia nojori quiniuria Pueyaso niquiara tama nojori miishanotajaaja. Naacuajitij, nojoriiri Jesucristoocua tiuyaquiquiaa Pueyaso jiyanooniuria nojori. Pueyasojuanaari

Cristo jiyatequiaari pa niti mosocoriquiano. ⁴ Naacuajitij, Cristo jaara mosaaquiaari, nojuajaari Moisés Rootasano tojiniu tohuateequiaari cutara. Naacuajitij, Pueyasoori puetunu nocua tiuuniaajanaa jiyatequiaa juhua sesa miyashijiacara. ⁵ Moisés cuajaari naajioquiaari taa na rootasano tojijica miiniutianiyani, juhua sesa miyashijica nojori quiniuria. Nojuajaari naa naajioquiaari:

“Cante puetunu cua rootasanojuanaa tojijiani, nojuajaari pueyaracaanu rishijiaara jiyatesaanutaniya”.

⁶ Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijica pa quiniuria. Naacuajitij, majaari naa nia niishiriojonu nioojiajinia nia taacanuusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari que-naaja naa nia niishiriojonutej! ⁸ Pueyaso Rupaacuajaari tari naa naajiotasaaquiaari pajaniyara:

“Niaacuajaari cua rupaa jiitiaa. Niaari na ni-

ishiyajuhuaaj. Nioojiajinia quiyacuajaari”. Cuno rupaa canaa na pahuataquiaa niajaniani, cunocujaari Jesucristoocua nia tiuuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niqiuara pahuatare: “Jesucristoori seetanujuanaa Jiyaniijianaa cutara”, noojiajinia na niishishacarijuhuaj Pueyasoori Jesu samiitiani quiaarihua macujiniji. ¹⁰ Seetanujuanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhuaaj, pa rupaata pa pahuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhuaaj:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata na jiyanooniu nocua tiuujia pueya. Nojuajaari jiyanoohua capora. Jiyaniijianaa cutaraari. ¹³ Tariucuacaanu Pueyaso Rupaajiniaari naa naajiotasano quiyajuhuaaj:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’ ”.

¹⁴ Jaara naa quiritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhuaaj, ¿pueyatucua taa nocua tiuurini, nojori

jaara nojuajiniji pahuataaquishoo quiyajaa?
 ¿Nojoritiucua taa nojuajiniji niishijia quirini,
 tamasaca jaara quenaaja nojori pahuataaquiri?
 15 ¿Pueyaso Rupaa pahuatanaatucua taa
 cuno pojoriicua quiaareni, nojori jaara
 jiyaramiquiyaquishaare? ¿Pueyaso rupaa
 pahuatanaate jiyaramiquiyaquishaaquiaari?
 ¡Maja! Jiyaramiquishaaquiaaricujaja. Naaratej,
 naa naajiotasano quiyari tariucuacaanu Pueyaso
 Rupaajinia:

“Jiyanohua timitiasano pueya cutaraari, noo po-
 jori canapueete tamasacaacua quiajani, no-
 jori na pahuatanura Pueyaso rupaa”.

16 Naajaa, majaari puetunu pueyajanaa tojiniu
 quiquiaa, Pueyaso Rupaa jaara nojori niquiara
 pahuatasaare. Naacuajitij, supuetana Isaíasri naa
 sequequiaari na taraajenuta:

“Jiyaniijianaa, majaari pueya tojiniu paniniu
 canaa pahuatasano quiajanijajiniji”.

17 Naacuajitij pueyanaa, paa jaara Jesucristo ru-
 paa pahuatasaareni, paari pa numaata na to-
 jiyani. Paa jaara pa tojishanoocua tiuurini, Pueya-
 soori pa jiyatenutaniya na pueya pa quiniuria.

18 Pa jaara Pueyaso pueyara jiyatesaaquiaa
 saaja pa tiuushacari Pueyaso rupaacua, jaara
 naa quiritij, ¿casaara puetunu Israel pueyajanaa
 Pueyaso pueyara jiyateyaquishaaquiaari-
 irini? ¿Cristo rupaateeri nojori niquiara
 pahuataaquishaaquiaari? Maja. Nojori
 niquiaracujajaari pahuatasaaquiaari. Naa
 naajiotasano quiyacuajajaari tariucuacaanu
 Pueyaso Rupaajinia:

“Pueyaso Rupaacuajaari puetunu jiyacajinia-janaa pohuatasaaquiaari. Na rupaari tojishaaquiaari puetunu tiquiyocuajanaa, jiya puequeetujinia”.

19 Jaara naa pohuatasaaquiaaritij, ¿Israel puey-ateeri Pueyaso rupaa niishiyaquiquiaari nojori tojishacari? Maja. Nojoricuajaari na niishijica quiquiaari. Nojoriiri saaja na ruuretajaca quiquiaari. Supuetana Moisés cuajaari naa naajiotaquiaari Pueyaso sequesano Israel pueyara, tariucua na tojiyashijica nojori quishacari:

“Maninia cua miishacari tiquiyocua quijiaca taucuaca nia niti, janiyari nia juaatiniutianiyani. Niaari jiyanohua juaaniutianiya cua jiyanooshacari mosanucua taucuaca”.

20 Na nuhuaji, supuetana Isafasri naa maatia sequequiaari Pueyaso niishitiosano nojuaja:

“Cucua jiaatiaashijica taucuaca cutaraari cua ruriataquiaa, cua tojijica nojori quiniuria cutara. Naajuhuj, janiyari cua pajeyashijica taucuacaacua muetaquiaani”.

21 Saniniuujia, Isafasri naa Pueyaso sequesano Israel pueyajiniji naajiotaquiaari:

“Janiyari puetunu juucajanaa Israel pueyacuaji masequiaa juucuani, maninia cua miiniu panishacari nojori. Nojoriiri saaja cua shocotequiaa, cua tojiyashijica pueya nojori quishacari”.

11

Israel pueyajiniji cureenoori Pueyaso saquirio-josano

¹ Israel pueya jaara naa Pueyaso tojiyashijiaca quiya, ¿Pueyasote seetanujuanaa nojori tarinitiacanu, na tojiyashijiaca nojori quiniuucua? ¡Maja pueyanaa! Janiyacuajaari Israel pueyanojaniuhuj. Abrahamri cua supuetana. Janiyari na jiananu Jacobo niyanu Benjamíncuajinio supuenoni. ² Naacuajitij, janiyari niishiyani, Pueyasoori maja na cartenu quiqianu puetunu tariucuacaanu na saquiriojosano Israel pueyajanaa. ¿Niaateeri supuetana Elíasjiniji naajiotasano niishiyaquiya? Tariucuacaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniuucua sesa:

³ “¡Cua Jiyaniijianaa, cuarta Israel pueyari puetunu quia sequesano caminiujunias pueyajanaa puecoorucuaa! ¡Saa janiyajaari cureyani! Naajuhuj, nojoriiri puetunu juhuacutucuajanaa niyarequetarucuaa, tee quia tojitiajaca pueya catijiaquiaa na seya quiocuaracuajani. ¡Nojoriiri quiarijia cua pajenuyajuhuj, na motunura janiya!”

⁴ Pueyasoori naa Elías riucuaquiaari saaja: “Janiyari siete mil pueya jiitiaajaani. Nojoriiri cua tojitiajaca. Nojoriiri maja na mojoquetaconu quiquiaa cuno sacuaraatia shipinishano Baalcuara cua niti, taa narta Israel pueya miiquiaacuaani”.

⁵ Quiarijiaari naajuhuj, Pueyasoori secaja na saquiriojosano Israel pueyajinijinio jiitaa, jiyanootio na quiniuucua. ⁶ Naa Pueyaso muerasu nojori quishacari saaja Pueyaso jiyanooniucua

nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiaca quiriquia, nojori maara paniyaquiri na jiyanooshaanura.

⁷ Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucuajanaa niishiyashijiaca nojori quiniuria. ⁸ Tariucuacaanu Pueyaso Rupaajiniacuajaari naa naajiotasano quiya:

“Pueyasoori nojori jiyatequiaari niishiyashiji-
 acara, maja nojori niishiniuria nojuaja.
 Naaratej, majaari nojori niishiniu quijia,
 nojori niquishacari Pueyaso miishano.
 Majaari nojori niishiniu quijiajuhuaj,
 nojori tojishacari na rupaa. Israel pueyari
 naa Pueyaso tojiyashijiaca quiyajaa
 quiarijiani”.

⁹ Supuetana David sequesanoori nojorijiniji naa naajiotasano quiyajuhuj:

“Pueyasonaa, Israel pueyari puetunu nojori panishanojuanaa jiiitaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritasano casaa cuara quiiria juhua norijia tama nojoririjaaja, nojori saniitiosaanura. ¹⁰ Nojori jiuujia cuara

jataara juhua cariyojuarujuriria, maja nojori niishiniuria seetanu Pueyaso rupaaajanaa. Nojori cuaara porequetacoora socua, pueyaracaanu taraatia nojori miishacari”.

Pueyaso jiyanooshacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijianaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiuushacari Jesucristoocua. Cunoori Israel pueya jiaatianiquiaa taucuacaacua, Pueyaso muerasu nojori quiniuriajuhuaj. ¹² Quiarjia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiuushacari, jiyacaritij, socua jiyanoohua maninia quiniutianiyari puetunu pueyapuerajanaa, puetunu jiyacajiniajanaa.

¹³ Taucuacajinijinio cuarta Pueyaso muerasunaa, cua tojiri. Nia sequenu paniyanijia. Janiyari seetanujuanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaj. ¹⁴ Janiyari seetanujuanaa naa miiquiaani cuarta Israel pueya jiaatianura niaacua, nojori tiuuniuria

Jesucristoocujuhua, noojiaqueya nojorijinijinio Pueyaso jiyatenura na pueyara. ¹⁵ Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooquiaa, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanohua maninia quiniutianiyari puetunu pueyapuerajanaa. Israel pueya tiuushacari Jesucristoocua, nojoriiri juhua macujiniji samiitiaconutaniuhua. ¹⁶ Seetanjuanaa maninia nia niishiniuria nio miriqui cua pohuatasanoni, maatia nia pohuatareeraj. Nia tojiri. Coteenujuanaa pa jiunocotasano neecaruu jaara maninia quiri Pueyasora pa niquitiosocoriquiano, tariquiaari puetunujuanaa maniajuhua Pueyasora. Naajuhua, naana nujuaca jaara maninia quiri puetunujuanaa, na cashacucuaari maniniuquiucujuhua. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooquiaaricuaa nocua na tiuushacari, naacuajiti paari niishiyani, Pueyasoori puetunu Israel pueyajanaa jiyanooniutianiyajuhua, nojori jaara tiuuriquia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jinianuucujinino supueno Israel pueyari juhua na cashacucua. Cuno na cashacucujinijinio jaara Jesucristoocua tiyaquiquiaari, Pueyasoori na piyotaquiaari. Niajaniya saniniuujia taucua-canaa, niaari panishoo quiquiaari, juhua nacu-

jiniaacoji olivo naana cama, maja natau. Naa-jaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniyu niaa cutaraari socua maninia pueya, Pueyaso cartesano Israel pueyajiniji. Niaa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Nia nujuaca cutaraari nia rishitiya.

¹⁹ Naa naasucuaari sequeya: “Taaquiririnij. Cuno olivo cashacucuaajaari canaacuaji piyotasaquiaari, saniniuujia canaa rupotasaa-nura nocua nojori niti”. ²⁰ Taaquiririnij, seetanujuanaacuaaquinateja nia sequesanojuaj. Saniniuujia nia niishiri, nojoriiri Pueyaso panishano naanajiniji piyotasaquiaari, nojori tiuyaquiniuucua Jesucristoocua. Niaari saniniuujia cuno naanaacua rupotasano quiya, saaja Jesucristoocua nia tiuuniuucua. Naacuajitij, maja tama nia cuaqueyajaaja nia shuquiritianu nia jiyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucucanaa, niaa mariqui piyotasaarohuari, niaa jaara Pueyaso tojiyashijiacara quiriohua. ²¹ Pueyaso jaara jiyanoyaquiquiaari na saquiriojosano pueyacuaa, nojori tiuyaquiniuucua nocua,

¿maatucua casaara jiyanoori niajaniyanijia? Niaacuajaari taucuaca. Niaacuajaari maja na saquiriojosano Israel pueyacuajinio.²² Naacuajiti pueyanaa, nia niishiri. Pueyasoori jiyanoohua maninia. Naajuhuj, nojuajaari saniitionu niishijia cutara. Naaratej, nojuajaari na tojitiaashijiaca Israel pueya jiyanoyaquiquiaari. Saniniuujia, nojuajaari jiyanoohua maninia miiquiaa niajaniya na jiyanooshano pueya nia quishacari, niaa jaara pueyaracaanu nocua tiuujiaa quiriquia. Niajaniya taucuacanaa, niaa jaara nocua tiuyashijiacara quiriohua, niaari nocuaji rupertasaanutaniuhua.²³ Saniniuujia, Israel pueya jaara Jesucristoocua tiuujiacara quiriohua, Pueyasoori nojori rupotanutaniuhua na panishano olivo naanaacua. Pueyasoori jiyanoohua cumaacaracacuaja na rupotanuuhara na panishano naanaacua.²⁴ Niajaniya taucuacanaa, niaari maja seetanujuanaa Pueyaso saquiriojosano Israel pueya. Niaari juhua nacujiniaacoji olivo naana cashacucua. Naajaa, nia tiushacari Cristoocua, Pueyasoori nia rupotaquiaari na panishano olivo naanaacuajanaa. Naaratej, majaari jiyajeneta Pueyasora, na piyotasano olivo cashacucua na rupotanuuhara tama neyonaacuajaaja, nojori jaara Jesucristoocua tiuujiacara quiriohua.

Pueyaso jatanishacari puetunu Israel pueyajanaa na pueyara

²⁵ Taucuacajinijinio cuarta Pueyaso pueyanaa, tariucuacaanu pueyari niishiyaquijia taa Pueyaso miiniutianiya Israel pueyani. Quiarijia cutara nia

niishiri Pueyaso niishitishano janiya, maja nia jiyaniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaca quiya. Nojoriiri naa quiniutianiya, puetunu Pueyaso saquiriojosano taucacajinijinio pueyajanaa cuaara Jesucristoocua tiuurijiaatijia. ²⁶ Jiyacaritij, puetunu Israel pueyajanaari jiyatesaanutaniya Pueyaso pueyarajuhuaaj, taa tariucuacaanu Pueyaso Rupaajinia naajiotasaquiaaricujani. Naa sequeyari:

“Sión tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niqiuohuacuajinio supueno pueya jiuujiajiniji. ²⁷ Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuacaanu cua sequesano nojori supuetanaani”.

²⁸ Quiarijia Israel pueya tiuyaquishacari Jesucristo rupaacua saniniuujia, nojoriiri juhua Pueyaso paraa, Pueyaso jiyanooniuria niajaniya saniniuujia, taucacanaa. Naajaa, Pueyasoori cuno Israel pueya paniyajaa, nojori supuetanaa quiniuucua na saquiriojosano pueya. ²⁹ Pueyasoori maja na jaariutianu quijia na niquitiosano. Na saquiriojosano pueya jiyanoojaari. Majaari nojori na ruuretanu. Pueyasocujaari Israel pueya saquiriojoquiaari na pueya nojori quiniuria, maninia na miiniuria nojori. ³⁰ Maniniushiquiari, niajaniya taucacanaa, niaari Pueyaso tojiyashijiaca quijia.

Israel pueya tojiyaquiniuucua Pueyaso quiarijia saniniuujia, Pueyasoori niaacua taraajequiaa. ³¹Nojoriiri Pueyaso tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. ³²Naacuajitij, Pueyasora, puetunu pueyajanaari na tojiyashijiaca quiya, Israel pueya, taucuacanio. Naacuajitij, Pueyasoori na naata jiyanooni nojorijiuhuj, nojori tiuushacari Jesucristoocua. Pueyasoori maja rimiajata na jiyanooni.

³³¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijiajanaa cutara! ¿Cante niishiquiaarini casaa Pueyaso miiniutianiyani? Na miishanoori jiyanoohua jiyajeneta. ¿Cante na naata na niishiniuni? Shaaqui. ³⁴Naaratej, seetanujanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! ³⁵¿Pueyasoteeri na panishano jiiitaaquiquiaari tamonu niqutionura nojuaja na panishano, na nuhuaji na niqutionuhua? ¡Maja!”.

³⁶Seetanujanaa puetunu casaajanaacuajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuaara naa quiiriatej!

12

Saaja Pueyasora pa quirij

¹ Cuarta Pueyaso niquiohuanaa, jiyanohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojjiaca nia quishacari. ² Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohanu tojjiaca nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanohua maninia.

³ Jiyanoojia Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajanijajanaa cua tojitiare quiarijia. Naa jaara Pueyaso cumaaca masequiaari nocua nia tiuushacari, nojuajaari puetunu niajanijajanaa jiyatequiaari tamaatia poonijosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijiaca nia quiniuria tamasacajiniji. Saaja jacaria niishiriojojuaca nia quiri, maninia nia miiniuria nia poonijosano, teyano Pueyaso sequequiaari nia miiniuriacua-jani. ⁴ Pa cuaqueyajiniacuma, paari queraatia tamaatia casaa jiiatiaani. Puetunu cunujuanaari tamaatia miiniu niishijia, maninia pa quiniuria. ⁵ Paari naajuhuj, taa pa jiniacuma casaacuaani.

Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa mitioonura.

⁶ Naatej, taa pa cuaqueyajiniacuma casaa tamaatia poonijosano miiniu niishiyacuaani, naajuhuj, Pueyasoori puetunu na muerasujuanaa na cumaaca niquitioquiaa, tamaatia miiniu niishijiaca pa quiniuria. Naaratej, cante Pueyaso cumaaca jiiitiaani, Pueyaso niishitishano nojuaja na pohuatanurani, nojuaja cuaara seetanujuanaa pueya niquiara pohuataara na taacanuyaquiniutia. ⁷ Naajuhuj, cante Pueyaso cumaaca jiiitaa pueya na naacunurani, nojuaja cuaara maninia naacuura pueya. Naajuhuj, cante Pueyaso cumaaca jiiitaa Pueyaso rupaa niishitiojona na quiniuriani, nojuaja cuaara maninia niishitiojora Pueyaso rupaa pueya niquiara. ⁸ Cante Pueyaso cumaaca jiiitaa pueya na shiniujiuniuriani, nojuaja cuaara pueya shiniujiuuria, maja pueya cartenura Pueyaso rupaa. Cante na jiiitiasanojiniji nareja niquitiojojua casamijiuniucua pueyani, nojuaja cuaara juhujaniya niquitiojora nareja, nojori na paniniutia. Naajuhuj, cante Pueyaso pueya jiiitianani, nojuaja cuaara jiiitaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuaara shuquiriaatia na naacuuranoj.

Pueyaso tojijiaca nia quiri, taa Pablo rootaacuajani

⁹ Seetanujuanaa panitiojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara.

¹⁰ Jiyanoehua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya nijaniyajiniji. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijiara. Majaari taajecori nia quiniu.

¹² Shuquiriaatia nia quiri pueyaracaanu, nia ni- ishishacari taa Pueyaso miiniutianiya jiyanoehua maninia na muerasuni. Saaja juhuajaniya nia re- jeretare niaa jaara naquiya miishaare. Pueyara- caanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiiitiaaquiri, nareja nia niqutiore nojori nia jiiiti- asanojiniji. Naacujitij, nojori jaara ruconaa quiri, nojori nia masuure nia tiacora.

¹⁴ Niaa jaara naquiya miishaariquia, majaari nia miitianaa nia sesacanu. Saaja nia secojore Pueyaso nojoriicuaara, Pueyaso taraajenura no- joriicua.

¹⁵ Cante shuquiriaatia quiyacuaani, nojoritia nia shuquiririjuhuaaj. Saniniuujia, cante nu- juqueyacuaani, nojoritia nia nujuquerejuhuaaj.

¹⁶ Jiyanoetiojuaca nia quiriquia, jatiqui nia quiniuria maninia. Majaari tama nia cuaqueya- jaaja nia jiyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuujia, tama nia cuaqueyajaaja nia mueyashitiri cutara, maninia nia rupuenura

paniyaquishoo pueyajuhuj. Majaari tama nia cuaqueyajaaja nia jiyatenu juhua socua niishiji-aca pueya nia quiniuria tamasaajiniji.

¹⁷ Naa jaara sesa miishaariquia, majaari nia paraa nia naminiu saniniuujia. Puetunu nia miishanojuanaa cuara quiriia maninia puetunu pueya niqiarajanaa. ¹⁸ Maninia nia quiri puetunu pueyatajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Naa jaara sesa miishaariquia, majaari nojori nia naminiu. Juhujaniya nia rejeretare saaja. Pueyasocuaajaari niaacua naminiutianiya nojori. Pueyaso sequesnocuaajaari naa naajiotasano quiya na rupaajinia:

“Quiria nia tarinitiare puetunu sesa nojori miishanojuanaa najaniya. Janiyacuajaari nojori naminiutianiya niaacuani”.

Cua tojiri. Pueyasojunaacuajaari naa sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinia naajiotasaaquiaaricuajani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuj, quia raatorenoj. Quiaa jaara naa na miiritij, tama nojuajaarijia jiyanojua caririquiniutianiya noojiajinia”.

²¹ Naacuajitij, naa jaara sesa miishaariquia, majaari nia juaaniu, naa mariqui sesa miijiara quirijiaariuhuj. Saaja maninia nia miiriquia nia paraca. Naacuajitij, niaari Sesaaca shocotanutaniya.

13

Pa jiya jiyaniijianucua tojjiaca pa quirij

¹ Pueyanaa, mijiria nia jiyaniijianucua tojjiatajaca nia quiri. Nojoricuajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri.

² Naacuajitij, cante mijiria jiyaniijianucua tojiyashijiani, nojuajaari jiyaniijiaara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya.

³ Paa jaara maninia miijiaca quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiaca. Sesa miijiaca cuara na puereera cutara, sesa miijiaca nojori quiniuucua. Saaja maninia miijiaca nia quiri. Naacuajitij, nia jiyaniijianucuaari maninia poojotanutaniya niajanijajiniji.

⁴ Nojoricuajaari Pueyasora poonijionaa, maninia nojori jiitianura niajaninya. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuajaari jiyaniijianucua cumaacaraca, sesa miijiaca nojori sanitationura.

⁵ Naacuajitij, nia jiyaniijianucua tojjiaca nia quiri maja nia saniitiosaanura, naajuhuj, maja Pueyaso tojiyashijia nia quiniuria.

⁶ Naajuhuj, nia cumaneecajiniji nia niqutiore nia jiyaniijianucua, taa nojori sequequiaa nia niqutionuracuajani. Nojoricuajaari Pueyasora poonijioquiaa pueyaracaanu, maninia nojori jiitianura niajaninya. Naaratej, nojoriiri cumaneeca masequiaa niajanijajiniji.

⁷ Naaratej, puetunu nojorijianaa nia niqutione, taa nojori sequequiaa nia niqutionuracuajani. Naacuajitij, niaa jaara sequesaa nia cumaneecajiniji nia niqutionura nia jiya jiyaniijiara, nareja nia niqutione. Naajuhuj, cumaneeca jaara jiya jiyaniijiara masenu cojiritiasaa, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuj, nia jiyaniijianucua tojijia nia quiri, nojori quiniucua Pueyaso jiyatesano nia jiyaniijianucua.

⁸ Pueyanaa, majaari najuhuaana casami nia poonu, niaa jaara cumaneecaaju quiri. Sanini-uujia pueyanaa, maja cutaraari niarta pueya paniniu nia puecanu. Pueyaracaanu nojori panijia nia quiri cutara. Naacuajitij, cante narta pueya panijiani, nojuajaari Moisés Rootasano tojijia cutara. ⁹ Supuetana Moisés cuajaari naa naajio-taquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasa jiiatasano casamiicua jiaatiaja nia quiniu”.

Socua queraatia na rootasanoori quiya. Niocua-jaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojijia quirini, paari tari puetunu na rootasanojuanaa tojijia quiyani. ¹⁰ Cante seetanujuanaa pueyano panijiani, nojuajaari maja sesa na miiniu narta

pueyano. Naaratej, paa jaara panijia quiriquiani, paari puetunu Moisés Rootasano tojjia cutarani.

¹¹ Pueyanaa, nio nia niishiri. Pa Jiyaniijia rii-ionu juuca pajaniyari tari quenaacoya. Cuno juucaari quiarijia socua cateca quiya paa jaara nocua tiuuquiaarini. Naaratej, cante juhua maqueya-jaani, nojuaja cuaara niucuaara, pa Jiyaniijiaara na poonijionura. ¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujianaa pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquicuaji na poonijionuracuaani, naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuria-juhuaj. ¹³ Seetanujuanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaari cuhuashiqui quijiaca. Naaratej, majaari mashaasequenuujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniucua nia jiiitiniu. Majaari juayonuujutajaca nia quini-ujihuj. Naajuhuj, majaari tamonu pueyano jiiitasano casaacua nia jiaatianu. Naajuhuj, majaari nia juaaniu tamonu jaara nia shocotare. ¹⁴ Naacuajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia,

maninia cutaraari Jiyanijia Jesucristo niishiti-
aja nia jitianura, na cumaacanio. Naa nia mi-
ishacaritij, niaari juhua soldadohua miaquetoo-
jotaja toque cushiojua, maja Sesaaca miitiniuria
sesa niajaniya.

14

*Maja quiarta Pueyaso pueyacuara nia rimi-
aaquenu sacuaraatia*

¹ Pueyaso pueyajinijinio pueyano jaara
Pueyaso rootasanojiniji taacanuujua quiriquia
pueyaracaanu, naajaa, na rupuejaca nia quiri.
Majaari nata nia juayonuujutano tamaatia
na niishiriojosacari Pueyaso rootasanojiniji.

² Naacuajitij, Pueyaso rootasano niishijia
nia quishacari cutara, niaa naasucuaari
niishiya nia naata puetunu miaquesanojuanaa
miaquenu cutara. Saniniuujia, cante Pueyaso
rootasanojiniji taacanuujuani, nojuaja
naasucuaari jiyaniya na naata saaja na natau
miaquenu, na shuquiritiniuria Pueyaso. ³ Cante
puetunu casaajanaa miaqueja cutarani, nojuaja
cuaara soyaquiiria narta Pueyaso pueyano, cante
na miaquesano miaqueyashijia saniniunijia.
Naajuhuj, cante puetunu casaajanaa
miaqueyashijiani, nojuaja cuaara sesacaaquiiria
puetunu casaa miaquejacajanaa. Cuno pojori,
shu miaquejaca cutarani, nojoricuajaari Pueyaso
jiyatesano na muerasu nojori quiniuriajuhuaj.

⁴ ¿Canteeri pajaniyani, tamonu pueyanora
poonijionaa pueya sesacaja pa quiniuriani? Tama
nojori camarnucuajaari nojori sequenutaniya,

nojori miishanote maninia, sesa soj. Naajuhuj, pa Jiyaniijia Jesucristocuaajaari cumaacaraca, na muerasu na jiyatenura maninia quijiaca nojori quiniuria.

⁵ Cua tojiri pueyanaa, noojiaqueya Pueyaso muerasujinijinioori niquiriyatu juuca semaana-jiniji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuara taacanuyaquiiria tama nia miishanojinijijiaaja, maja nia macuhujetenura nioojia. ⁶ Cante niquiriyatu juuca seamanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaani, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquiija Pueyaso na shuquiritiniuriani, cuara naa miiria. Nojuajaari Pueyaso shuquiritijuhuj na secojosacari Pueyaso, na natau na miaquenura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja.

⁸ Paa jaara mijiria quiyani, paari pa Jiyaniijiaara rishiquiaani. Paa jaara cusoyareni, paari pa Jiyaniijiaara cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jiiitiasanoni.

⁹ Jesucristocuaajaari cunora cusoquiaari,

macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniuriajuhuaj. Naacujitij, nojuajaari pa Jiyaniijiajanaa cutara.

¹⁰ Naaratej, saaja niquiriyatu Jiyaniijia pa jiitiasacari, ¿paatucua casaara parta Pueyaso muerasu soojeaca quirini, nojori miaqueyaquiniuucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya.

¹¹ Tariucuaaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojuquetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasojuanaa cutara! Puetunu quia miishanojuanaari maninia’ ”.

¹² Naacujitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³ Naacujitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiacu quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niquiara

nia miiniuria nojori jiyanishano sesa casaa. Nojori jaara saniri miiniu nia miishanocuaa, naacujitij, niaari tari sesa miitirii nojori Pueyaso niquiara. ¹⁴ Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuaara miaqueyaquiirianoj. Jaara na pueresano saniri miaquenu, nojuajaari tama noojiajaaja macuhujanutaniya. ¹⁵ Naacujitij, paa jaara parta Pueyaso pueyano macuhajetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesucristocujajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani? ¹⁶ Naacujitij, majaari nia shanacunu Pueyaso tojiyashijiaca pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷ Seetanujuanaa nia sequeyanijia, majaari Pueyaso muerasu pa quiniu casaa pa miaqueyaquiniuucua, casaa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijia pa quiniuria, jatiqui pa quiniuria juhuajaniya. Pa panitiaajaariuhua shuquiriaatia quijiaca pa quiniuria. Paacuajaari na Sohuanu

jiitiaani, naa maninia pa quiniuria. ¹⁸ Paa jaara naa quijiaca quiriquiani Cristora pa poonijosacari, Pueyasoori pa shuquiritiaa. Naacuajitij, Pueyaso tojiyashijiaca pueyari maja na rerequetenu quiniutianiya pajaniya.

¹⁹ Naarate cuarta Pueyaso pueyanaa, jiyano hua nia saniniujiuri taate nia naata maninia rupuetoosano quiniu puetunu niarta Pueyaso pueyatajanaani. Naacuajiti nia naata tama cumaquitioonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajania, saaja nia miaquenuucua nojori niquiara nojori pueresano casaa. Seetanujuanaa, Pueyasora, puetunu miaquesano casaajanaari maninia pa miaquesocoriquiano. Saniniuuja, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacuajitij, majaari nia naata maninia rupuetoosano quiniu niaa jaara nia miishanota taraajori quia niarta Pueyaso pueya.

²¹ Naacuajitij, socua maninia juhuari maja pa miaquenura parta Pueyaso pueya pueresano casaa. Naajuhuj, majaari pa ratunu jereeca mashaca nojori niquiara, cuno naa pa miishano jaara quiri nojori shiniujiuniuria sesa nojori miiniuria. Naajuhuj, pa cartere puetunu parta Pueyaso pueya jyanishano sesa miiniu casaajanaa, maja nojori pa taraajonura nojori ruparetanura pocuaji. ²² Naacuajitij, Pueyaso Rupaacua nia tiushacari seetanujuanaa, niaa jaara niishiya nia miishanoori maja sesa,

tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhajetenura na miiniu nuhuaji. ²³ Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiyari taa na niishiriojiyacujani. Paa jaara casaa miaquere seetanujuanaa pa tiuyaquiniutia Pueyasoo cuani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanuunuta na miiriquiani. Naaratej poojiaari macuhajenutaniya.

15

Parta Pueyaso pueya pa shuqiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanojuaja seetanujuanaa Pueyaso Rupaacua tiuyashijiaca. Naacuajitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojjiacacuaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacacuaani, nojori pa cumaquiri. Majaari pa niishiriojonu tama pa cuaqueyajaaja pa shuqiritiniuria tamajaaja. ² Puetunu pajaniyajanaa cuaara niishiriojoora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojijia na quiniuriajuhuaj.

³ Paacuaajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariuutianura Sesaaca. Naacuajitij, nojuajaari nio tariucuacaanu tama nojuajiniijiaaja naajiotasano tohuateequiaari:

“Cua Quenaa, cuno pojori, canapuete quia sesacajacani, nojoriiri cua sesacaajuhuaaj, cua miiniuucua quia panishano”.

⁴ Seetanujuanaari pueyanaa, puetunu tariucuaacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanijiaajaariuhuaaj. Naacuajitij, paari juhuajaniya sashiya pa Jiyaniijiani. ⁵ Pueyasocuaajaari pa cumaquinia, maninia rejeretajaca pa quiniuria, cumanijasano pa quiniuriajuhuaaj. Nojuaja cuara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. ⁶ Naacuajitij nia naata pa Que Pueyaso, mariyata pa Jiyaniijia Jesucristo maniniuhaaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jiyanootioojuaca nia quiriquia, taa Jesucristo jiyanooquiaa pajaniyacuaani, maninia rupuetoosano nia quiniuria. Naacuajitij, pueyari

Pueyaso timitianutaniya nojori niquishacari Judiocuaca taucuacata Pueyaso maniniuhuaqueetaano jatiqúi. ⁸ Janiyari seetanujuanaa nia sequeyani, Cristoori mijiria niquiaari Judiocuacaacua, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucuacara quiquiaarijiuhuaj, nojori maniniuhuaqueetanura Pueyaso, na jiyanooniucua nojorijiuhuaj. Tariucuacaanu Pueyaso Rupaajinia supuetana David naajiotasanoori naa quiyajuhuaaj:

“Maninia quia miiniucua janiya Pueyasonaa, janiyari quiajanijajiniji poojotanutaniya maniniani taucuaca jiyacajinia. Maninia quia miiniucua janiya, janiyari quia timitianutaniya cua jaaquequejosanotani”.

¹⁰ Tamaqui Pueyaso Rupaajinia naa naajiotasanoori quiyajuhuaaj:

“Pueyaso niishiyashijiaca taucuacanaa, Pueyaso saquiritiojosano pueya nia cojiri, mariyata jatiqúi nia shuquiritianura pa Pueyaso”.

¹¹ Pueyaso Rupaajinia, supuetana David naajiotasanoori naa sequeyajuhuaaj:

“Pa Jiyaniijia Pueyaso nia maniniuhuaqueetare, puetunu niajanijajanaa, tamaatia rupaaca pocuajaca taucuacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniucua pajaniya”.

¹² Supuetana Isaías naajiotasanojinijijiuhuaj, paari niishiyani Pueyasoori taucuaca jiiitianu

panijia pueyaracaanu, maja saaja Judiocuaca. Naaratej, Isaiasri naa naajiotaquiaari:

“Supuetana Isai niyanujiniji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinijinio taucuacajanaari nocua tiuujiaa quiniutianiya”.

¹³ Pueyasocuaajaari poojiajinia poonijiojua, juhuajaniya pa sashiniuria pueyaracaanu, nojuaja cuara miirijiaatijia puetunu na sequesanojuanaa pajaniyara. Pueyanaa, Pueyaso cuara nia timitiiria jyanohua. Naajuhuaaj, nojuaja cuara nia jiitiaara juhuajaniya, canapuate nocua tiuujiaacacuajani. Naacuajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari niajaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

¹⁴ Cua panishano Pueyaso niquiohuanaa, naa cua naajiojinia cua nacasusacari jyanohua nia-janiyatej, majaari nia jyaniniu janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quijiaa. Niaacuajaari Pueyaso rupaa niishijiaacajuhuaaj. Naacuajitij, nia naata tama nacasutoo-jonujuaaja maninia, maninia rupuetoojuaca nia quiniuria Pueyaso niquiara. ¹⁵ Naajaa, quiar-ijia janiyari niaacuara naajiyani cua niishitini-uhua niajaniya tarijia nia niishishano. Cua jyanootiuri, nio cua naajiojinia jyanohua cua nacasunuucua niajaniya. Naa nia rootaanijia Pueyaso jiyatenuucua janiya Neyanu Jesucristo

jiyaramiquishano, taucuaca cua pohuatanura na rupaa. ¹⁶ Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucuacani. Naacujitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritiasano muerasu quiniutianiyajuhuj.

¹⁷ Pueyasora cua poonijiosacari, janiyari jiyanohua timitiaa Jesucristoni, cua niquishacari taa taucuaca tiuuquiaa na rupaacuan. ¹⁸ Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaca tiutiquiaa na rupaacua. Nojoriiri nocua tiuuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniuucua nojori niquiara.

¹⁹ Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaajanaa. Janiyari pocuaji Tacuna Jesucristojiniji tari pohuataquiaari puetunu tiquiyocuajanaani, Jerusalén tiacajiniji, puetunu Iliria jiyajiniarajanaanio.

²⁰ Naa cua pohuatasacari pa Jiyano Jesucristojiniji puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaaquiaari juhuanujuajacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojinijini. ²¹ Naa cua pohuatasacari Jesucristojiniji cuno pueya niquiaratej, janiyari nio tariucuacaanu Pueyaso Rupaajinia naajiotasano tohuateeriquiaani. Naa sequeya

Jesucristojiniiri:

“Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari ni-ishiniutianiya cante nojuajani”.

Pablo naquerejosacari Roma tiacajiniara

²² Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniuucua cua quianura. ²³ Quiarijia cutara, janiyari Jesucristojiniji pohuatanu tucutarucuaa tarini, tee Jesucristo rupaa tojiyaquishaaquiaari juhuanujuajacuajani. Janiyari Espania jiyajinia pohuatanu paniya Jesucristojinijijiuhaaj. Queraatia marijiaari tari cua shocojocanu pueyaracaanu cua naquerejosacari niaacua cua quianura. ²⁴ Naacuajitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiyani nia naacunura janiya, cua quianura Espania jiyajiniara. ²⁵ Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niquitionuhuara cumaneecani, niya quiniaa parta Pueyaso pueya niquitiojosano nojoriria. ²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanohua maninia miya. Nojoriiri tama niishiriojonuucanujuaaja nareja na cumaneeca niquitiojonura Jerusalén tiacajinia quiniaa casamijjuniucua Pueyaso pueyara. Cunora, nojoriiri quiarijia na rerateya cuata

na jiyarosocoriquiano. ²⁷ Nojoriiri naa miya nojori niishiriojosacari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasaanura taucuaca niqiara. Naaratej, taucuaca cuaara saniniuujia quiarjia naacuura casamijuniucua Judiocuaca, nojori jiiitasano cumaneecata. ²⁸ Naacujitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquniuria niajaniya. ²⁹ Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiiitanuucujuhuj, mariyata Pueyaso Sohuanu panitiootesacari pajaniya, janiyari jiyanohua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuj, Jerusalén tiacajinia cua quiasacari. Naajuhuj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. ³² Naajuhuj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua

quishacari niaata, janiyacua tii samaatesee nia shuriucuaní. ³³ Pa jiyanoojia Pueyaso cuaara maninia jiitiaara puetunu niajaniyajanaa. Cuaara naa quiiriatej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ² Pa Jiyaniijia panijiaca nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujuajaariuhuj.

³ Quiria nia sarhuatate Priscila, neyaca Aquilanio. Nojoriiri cua cojiniaa pa Jiyaniijia Jesucristora poonijionura. ⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanohua nojori timitiaani, naa nojori jiyanootiuniuucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucuacajinijiniojuanaari nojori timitiaajuhuj,

naa nojori miiniuucua. ⁵ Quiria nia saruhuatatarehua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia saruhuatatarehua cua rupuena Epéneto. Nojuajaari coteenujuanaa Jesucristoocua tiuquuaari Asia jiyajinia. ⁶ María nia saruhuatatarehua quiriajuhuaj. Nojuajaari jiyanoehua poonijioquiaari niaara. ⁷ Quiria nia saruhuatatarehua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuahuaj. Andrónico, Junias, nojoriiri socua coteenu janiyajiniji tiuquuaari Jesucristoocua.

⁸ Nia saruhuatatarehua Ampliato. Nojuajaari cua panishano pueyano, Jesucristoocua na tiuuniuucua. ⁹ Naajuhuj, quiria nia saruhuatatarehua Urbano. Nojuajaari pa Jiyaniijia Cristora poonijionajuhuj. Cua rupuena Estaquis nia saruhuatatarehujuhuj. ¹⁰ Apeles nia saruhuatatarehua quiriajuhuaj. Nojuajaari puetunu casaajanaa rejere-taja cutara, Jesucristoocua tiuujia na quiniuucua. Aristóbulo tiajinia quiniaa pueya nia saruhuatatarehua quiriajuhuaj. ¹¹ Naajuhuj, quiria nia saruhuatatarehua Herodión, parta Judio pueyano. Naajuhuj, Narciso tiajinia quiniaa pueya nia saruhuatatarehua quiria, noo pojori pa Jiyaniijiaacua tiuujia pueyatej. ¹² Trifena nia saruhuatatarehua quiria, Trifosajuhuj. Cuno maajipohuari pa Jiyaniijiaara poonijionuujaca. Naajuhuj, pa panishano maaji Pérsida nia saruhuatatarehua quiria. Nojua-

jaari jiyanoehua poonijiojua pa Jiyaniijia. ¹³ Rufo nia saruhatarejuhuj. Nojuajaari maninia tojijia pa Jiyaniijia. Na nucua nia saruhatarejuhuj. Nojuajaari juhua cua nucua quiquiaari quiria. ¹⁴ Nio pojori quiria nia saruhatarejuhuj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhuj, nio pojori nia saruhatare quiria, Filólogo, necocua Julianio, Nereo, na rimiatunio, Olimpasjuhuj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia saruhatare seetanujuanaa nia paniniutia nojori. Puetunu niqijinio parta Pueyaso pueya maapuejanaari cua sequecanuni cua saruhatanura niajaniya.

¹⁷ Cuarta Pueyaso pueyanaa, nia nu-mooteyanijia, jiyanoehua nia cojuare tama nia cuaqueyajaaja najuhuana tamaatia niishitiojonuujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacuajitij, Pueyaso pueyari juaatiooquiaa. Majaari nojori niishitiojonu pueya taa coteenujuanaa nia niishitiojosaquiaari seetanu rupaajanaa cutarani. Naa sesa niishitiojonuujuacaacuaji nia rupertere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuana shanoehua nojori pohuatasanota, nojoriiri niishiyashijiaca pueya sapojoquiaa. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojitiajaca cutara.

Naaratej, janiyari jiyano hua nia timitiaani. Naajuhuj, janiyari paniyani niishijia nia quiniuria, saaja seetanu rupaajanaa tojijia nia quiniuria, maninia miijia nia quiniurijuhuj. Saniniuujia, sesa niishitiojosano niishiyashijia nia quitiriquiani, maja sesa miijia nia quiniuria. ²⁰ Naacujitij, poojia cajitijia Pueyaso nia cumaquiniutianiya, Satanás nia shocotanura na sapojosacari nijaniya juucua. Niaari juhua na tanacunutianiya jiyocuara, Pueyaso tojijia nia quiniucua. Pa Jiyaniijia Jesu cuara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuatanura nijaniya. Cuarta Judiocuaca Lucio, Jasón, Sosípater, nojoriiri nia saruhuataajuhuj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyaroscoriguiano. Janiyari nia saruhuataajaniuhuj Cristoocua tiujia cua quishacarijuhuaj. Niojuanaa, pueyanaa.

²³ Parta Pueyaso pueyano Gayoori nia saruhuataajuhuj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquiiijosacari nio tiacajinia. Parta Pueyaso pueyano Erastoori nia saruhuataajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuj.

24 Pa Jiyaniijia Jesucristo cuaara cumaquiiria puetunu niajanijajanaa.

Pablo maniniuhuaqueetasacari Pueyaso, quera na tucuatasaacari na naajio

25 ¡Pueyanaa, jiyanoehua pa maniniuhuaqueetare pa Pueyaso! Nojuajaari na naata cumaquiniu niajanija, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa niajanijacuajani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyojua, Pueyasoori jiyasohua tamajaaja na niishishano jiitiaja Neyanu Jesucristojiniji. 26 Saniniuuja, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuutasanojiniji paari quiarjia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarjia pa niishiniuria Neyanujiniji. Quiarjiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaca nojori quiniuria, Judiocuaca, taucuacanio.

27 Pa Pueyasoori jiyanoehua niishijia cutara. ¡Pueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiri-tiasaaria pueyaracaanutej.

**Quiarinio pueyaso rupaa pa jiyaniijia
Jesucristojiniji pueyano rupaajinia
New Testament in Arabela (PE:arl:Arabela)**

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

90034700-94c6-5f48-ae9c-2383843fed68